



PROVINCIA AUTONOMA DE BULSAN - SÜDTIROL
Direziun provinziála Scolines y scores ladines

Bulsan, 14.06.2024

Salüt por la fin dl ann de scolina y scora 2023/24

Incö, ai 14 de jügn se stluj jö le laur y insegnamënt por la comunité dla scolina y scora ladina. Dagnora n travert da arjunje, da arcumpedé i ultims dis.

N ann de scolina y de scora 2023/24 ch'i podun araté regular chiló da nos, por fortuna zënza de gran desgrazies, ince sc'i ne podun nia ascogne les preocupaziuns por nosc monn incëria. Tröc é i traversc arjunc y les competënzes madurides inant te chësc ann. La comunité scolastica á dessigü podü se daurí inant y crësce deboriada

N pinsier ti vá a mituns y mitans che stluj jö n scalin de süa biografia scolastica: la scolina, la scora primara, la scora mesana y la scora alta de nüsc paisc ladins.

N dilan de cör ales insegnantes y ai insegnanc de vigni livel scolastich, al personal pedagogich dles scolines, a direturies y direturs adöm cun le personal nia insegnant dles istituziuns scolastiches, ales families por le sostëgn da vigni de, ales cöghes y ai coghi dles menses, a chi che á fat le trasport scolastich, ai comuns, ales aministrazziuns y uniuns por ci che ai á porté pro al bun garaté dl ann scolastich.

A düc i scolari y les scolares, studënc y studëntes che stluj ciamó jö so scalin formatif cun n ejam de terza mesana o maturité mies aodanzes che al ti portes la sodesfaziun de na buna conclujiun. Dilan ince ales comisciuns d'ejam che le laur che ares fajará cun impëgn y profesionalité.

Y a düc y dötes spo de bunes vacanzes miritades, da palsé, da ti ji do a pasciuns fora dla scora, da ponsé inant, da se gode en pesc la natüra y de atres realtés.

Edith Ploner
Intendënta